



1 Maret 2023
Hosea 7: 8-16



Ibanto Dibata



Sedar entah la sedar kita, rusur kita protes man Tuhan. Kita jungut-jungut, merawa, ngeluapkan emosi alu kata-kata si la pantas. Tempa-tempa kita setara ras Dibata. Bagi si la puas kita bas kegeluhenta enda, sebab kai si irencanakan kita la tersehi. Adi si bage jadi bas kegeluhenta, mawen kita jadi kalak si apatis, kinitekenta lanai paguh bahkan banci jadi ateta “kiam” arah perhatin Tuhan. Lit nge si deban si banci jadi penampatta ateta. Nterem kalak si lanai setia man Tuhan ban la tersehi bagi sinisurakenna. Perlu isingetken man banta guna mengoreksi diri entahsa ban kesalahenta nge maka bage jadina, perban sedekah enda pe enggo kita nilah ibas Dibata nari. Ntahsa banci ka nge lit sura-sura Tuhan erlajar kita guna tetap erpengendes man baNa.

Situasi Bangsa Israel asum Nabi Hosea erdahin itengah-tengahna emekap situasi bangsa si la patuh man Tuhan. Israel ernalem man bangsa-bangsa si deban. Ertoto ia man Dibata sebatas kata-kata ibas biberna nari ngenca, la ibas pusuhna nari. Banna ka carana bagi kalak perbegu ndampes-ndampesken bana janah ngandung bas ingan medem. Nina nge ia mindo penampat man bangsa si deban, mekuah kel ate Dibata ngenen Bangsa Israel e sebab ieteh Dibata bangsa si deban e engkeriken gegeh Israel ngenca (ay. 8-9).

Bangsa Israel e eme bangsa si la ertetap ukur, ia kiam kujah kiam ku je. Arah siapai nge kari reh penampat man bangku atena. Kenca kiam ia ndahi Mesir, kiam ka ia ndahi Assyur. Sitik pe la ingetna mulih ku Dibata. Emaka kukimbangken me bantongKu nina Dibata. Banton enda jaring, seri ras jaring guna nangkap perik emaka lanai banci kabang perik si enggo ibanton e. Bangsa si la patuh e ibanton guna iukum, Dibata mereken pengajaren man bangsaNa alu tujun gelah bangsa e setia man baNa.

Ayat 15 “Aminna aku nge si mpebelin-belinca.....rst” alu kata-kata si enda situuna Dibata e nginget-ninget nai asum kitik-kitik denga Israel e la mbue Langkah si ietehna. Ngena kel ate Dibata ia. Tapi reh belinna bangsa e lanai inget uga perkuah ate Dibata e man bana. Bage me pe kegeluhenta enda, kitik-kitikta nari Dibata kap singlarak-ngarak dinging masu-masu kita. Ula sipebelin sura-suranta tapi erdalanlah tetap ibas kesetiaan nandangin Tuhan. Alu bage la ipake Dibata “bantona” guna nangkap dinging ngukum kita.